



一

雪堂隨筆卷三

丙寅

目錄

諸體詩四十一首

諸體文十五首

附銷夏小品詩二十首





雪堂隨筆卷三

丙寅

江寧顧起元太初著

元日偶題

峻嶒瘦骨強支吾  
雙袖郎當懶自扶  
解薜一官仍草莽  
看花雙眼遽模糊  
維摩室小惟懸榻  
惠子方多且據梧  
謝客杜門無一事  
祇拚清興倒屠蘇

二日過遜園



一週甲子再逢春畱得支離一病身六代舊存  
文物地五朝常見太平人梅華繞座香霞滿杉  
影垂簷翠雨新莫訝喧呼驅鳥雀可堪高枕遠  
風塵

勅封承德郎戶部浙江清吏司主事碧山倪  
公暨配 勅贈安人余氏合葬墓志銘

碧山倪公有子計部君舉進士高第守尚書度  
支郎會 天子以 皇子生推恩羣下父母

公得以子貴封戶部浙江清吏司主事配李與  
余皆得贈安人公家世素封今乃受爵級服冕  
乘軒與諸大夫伍里人榮之計部君奉 使江  
南又得以其間侍公杖屨于三山二水間盖前  
是吾里中之以子貴者不數人而子就家以養  
者又最爲罕邁今公乃邂逅得之人愈以爲公  
樂而公且素彊健力用如少壯時覲公者咸私  
謂矍鑠哉是翁不百歲不止也亡何以疾聞遂



及于大故嗚呼惜哉計部君身得奉公含殮乃  
辟踊號咷歎公之不逮已終養且追痛余安人  
之無祿蚤世弗克待已貴也因奉公柩筮某年  
某月某日啓安人之窆合焉手續公安人行事  
匍匐詣余請爲志其墓余與公同里聞于公父  
子聲跡相慕而家季又幸與計部君雁行舉鄉  
試知公爲深誼不得辭乃撮其大者志而銘之  
公諱一本字惟務碧山其別號也倪之世系載

譜牒者甚遠其近而顯者爲宋學士吳興文節  
公思數傳而徙居曲阿至汪溪公始挾筴遊金  
陵子守溪公與配湯孺人因習業于江寧遂占  
籍定居焉守溪公舉三子公爲長生而穎敏父  
命之從塾師授書旣壯有室矣會守溪公老不  
能劬家政而公室李安人又蚤卒公乃慨然太  
息曰今此何日而某猶刺促章句爲僞腐乎遂  
謝去博士業改服賈治絲枲精奇業售輒數倍



迺再娶余安人安人者羽林余公之女也性體  
端重善治諸女紅父母鍾愛之不輕字旣許公  
輪且迂矣不忍持其踵而泣請公就其家結褵  
踰月歸則安人與公日侍守溪公與湯孺人側  
甘毳之供晨昏之間鮮有不當意者而佐公督  
家人勤敏趨事業用是隆隆起公二弟旣娶家  
一秉于公夫婦而公與安人撫視惟謹蓋數十  
年手足娣姒無間言也守溪公與湯孺人先後  
卽世公與安人哀毀有加禮已乃以家授其弟  
而身遊于燕公雖廉賈而精心計息常倍起然  
性慷慨好義人以緩急赴者蔑弗應蓋里中之  
以宦遊燕若羈旅與緇流羽客之屬有需公必  
隨輕重賦之人得所願而去間有貸公訾以市  
而折閱者公輒取券焚之卽有重獲利者公第  
以常例徵弗過求也以是公義聲日著于兩都  
而業乃日挫旣歸而視二弟之橐垂垂如縣磬



然責逋者且衆公乃捐所置產以償時公家計中落而計部君美秀而文公知其必貴撫之語安人曰生子如此足散人懷是兒必且大吾門吾與汝其善成之因延名師俾就學博求圖史縱使讀之以擴其志逮試爲博士弟子所爲文爲諸公所器重則公益自喜其慷慨好義不以豐約撓情自如也安人篤愛計部君念公日夜望其成又不敢以顧復廢丸膽每遣就外傳私輒飲泣有病戒家人勿使知惟計部君亦時時念二親之望我若此沈湛于冊鉛之思卽飴枕弗暇問也乃安人竟先公而卒計部君痛母之亡又不忍重傷其父之志益自奮力于學蓋辛酉壬戌之役連得雋而公之喜可知也詒書相慰勉以潔已奉公先國家之務而後私圖計部君奉其言惟謹亟圖省覲而歸期滿則公輒趣裝使北曰無戀戀老人鄰下怠若事計部君謁



選得戶部奉

命督京倉公踰年身往視于

邸見其鈎稽穀秩之數出納必中程胥役無所牟利歲省羨萬餘石錄以佐大農公乃輾然喜曰兒服官如此吾復何憂會

上覃恩公得

從闕下拜

命遂飾駕歸矣歸而里中親

故日持羊酒以賀公間則召諸昆季故人時與擊鮮爲宴樂絲肉遞陳履舄交錯終席靡勸公雖與寄華曠吐納風流然禮客甚恭與物無競

粥粥循牆不爲車上儻月旦咸以長者稱之計部君以督餉輶車往來吳中時時過里多方以娛侍公見者謂是父是子相與引翼公之受祉未可量也豈意公一旦遂乘化而往哉計聞之日與公父子游者無不流涕已而謂公年近大耄歷算已長光奉恩綸身榮且顯達生玩世正可與安人含笑於九原而計部君才品地望爲時所推洊陟華臚所爲勲榮公與安人者尚



未有艾子姓繼起抑既有徵人間世又何不足  
公所乎計部君亦可自釋其罔極之悲矣公卒  
于天啓乙丑之十一月十二日距其生嘉靖壬  
子之二月初十日享年七十有四安人卒于萬  
曆癸丑之七月初七日距其生嘉靖戊午之十  
二月初九日享年五十有六子二長卽計部君  
嘉慶天啓二年進士官戶部浙江清吏司主事  
娶徐氏封安人某公女次嘉祚武學生娶徐氏  
某公女女一適程某子孫二長震次霖孫女二  
長字歐陽坦府庠潛夫君子次字俞錄年光祿  
少卿容自俞公子皆計部君出墓在某鄉某山  
之阡負某向某系之以銘  
銘曰無德不酬昔有成言不于其身于其子孫  
身爲玄圃毓此瑤琨祥翁于天駟馬其門未盡  
之報詒爾後昆於戲若公與安人者夫是之謂  
善建不拔而終古以固存者邪



龍淮高翁開六袞令子文學索予詩爲壽今  
翁進八袞矣文學持前詩屬予次韵以祝因  
和得四章爲翁奏之翁筭方長予才未盡九  
十時當更爲翁賀翁今且笑而爲予舉文學  
之觴可也

靄靄春雲燦錦袍霏霏香霧滿闌臯遇仙宴擗  
蒼麟脯生子文占白鳳毛槃内玉光投火棗帳  
中金顆薦冰桃稱觴子夜神方王醉飲瓊漿聽

八璈

舞綵行看繡作袍壽筵今見啓庭臯錢鏗八百  
曾斟雉眉叟三千幾伐毛醉後有言思報李閒  
中無事憶媮菟幔亭處處堪張樂可許仙妹爲  
鼓璈

青瑯玕杖赤霜袍調霍躡躑向九臯搔背長疑  
舒鳥爪竦身輕似舉鴻毛千頭碧樹仙人橘百  
畝玄都道士甕持此爲翁將進酒不妨頻奏紫



雲璈

令子名宜掛綠袍寧馨人望起神臯論才品自  
東西晉傳業詩爲大小毛月滿碧霄將砍桂霞  
生紫滂會嶠苑封章佇看楓宸下好聽雲間響  
十璈

新安夢圃鄭公行狀

新安之名族大家來游金陵者樂其土風之清  
淑人士之都雅多僑寓忘歸其賢者好禮慕義  
與賢豪相結因得以有聲縉紳間以余所身遘  
往還夢圃鄭公爲最著公諱澤字于榮號曰夢  
圃歛之某里人也王父南峯公父忠五公世以  
什一爲業修隱德名不出里閭公十二歲而孤  
母吳孺人撫之烝烝然影相弔也公生而敏慧  
從塾師學將以經術進念先業之不振去服賈  
治鹽筴拮据淮揚凡十餘載業大起顧視先世  
所遺不翅倍蓰矣公雖以貨殖起家賦性高潔



好義決聞古之節烈上佐公家之急下拯人于危迫者時感慨思奮身以從之乃挾其家而居金陵都人士素以聲跡嚮慕公亡不願與公締交者門外長者之車轍後先相望縉紳先生聞夢圃公之名咸以隱君子欽屬之其在吾鄉余與家仲大鴻臚爲相暱它若宮諭焦公少宰朱公輩皆以上賓禮公蓋重公之好行其德與世之樸滿以滯財捐蠹以鬻名者異也公孳孳行義恒恐弗及又耻從通都大邑中奪賢豪長者權其緩急人也旣以存亡生死矣深自隱避卽受德之人亦恒秘勿使知昔人以壺餐活翳桑之餓夫以綈袍卹故人之寒以錦被葬逆旅之書生以相國祿贍待舉火者七十餘家以乘輿濟溱洧之涉以萬杵施佛寺之金義高矣名亦與之俱著跡公生平所施予如前類者甚衆然深祕弗言人知之亦不能更僕代公言也公嘗



值盛暑念縣獄之頌繫可憫陰令人刺其應輸  
贖而無力者若而人密使持金代之輸其人得  
釋去終不知公爲已地李士謙所謂陰德猶耳  
鳴人所不知公之謂矣繇金陵抵鳩茲百八十  
里路多山坳水澁嶢峩沮洳所在有之公往來  
新安念此孔道也梗不可治病豈獨在有司誓  
捐訾貿磚石葺爲坦途請于中丞玄仗徐公紀  
綱其事屬余題疏以倡好義者人謂公生平所  
捐治道路橋梁不知凡幾此一役也功可與江  
山並遠未及告成而公卽世嗚呼惜哉始公王  
父危身以保先墓有英雄氣父逆知榜人死而  
取所寄物有幾先之哲顧皆不及中壽而卒公  
大母某孺人母吳孺人俱享大年一則百有餘  
歲一則九十有餘歲公德行顯于祖父神姿瑩  
澈骨體清峙占公之壽不難埒兩孺人乃七十  
有五而遽隕雖視其祖父實已過之人猶謂公



之道攸而命促非天之所以報善人也余觀今人幸而享有高訾其嗇者嗷嗷而守錢乃至損半菽落一毛可以貸人之死亦忍弗能割其勉爲德者財捐升斗秒忽之惠已不勝德色沾沾然已號于人蓋余嘗讀代間志狀表傳之文見其中所載傾財好施之事十人而九按之豈必皆實故余每謂人草此類文嘗執筆躊躇不敢輕下也若公之行事種種可紀而不得其名不能一一爲公盡述之然卽今之所載者起公于九原公可無愧斯言卽傳公于百世余亦無愧斯筆矣於戲人生有盡義問無窮公卽不躋上壽又何憾哉公舉丈夫子一爲太學之槃繇博士高第弟子挾筴游成均其文爲名公所重是將旦夕取青紫人謂天之報公者當在于是太學又舉子二見之者以其有英特之姿可相繼以大公門然則公之世祚昌大而熾殆未可量



也公體素健晚年以方士言行煉氣術久之火  
內炎而頭痛治之浹月弗効又投以重寒藥踰  
夕而卒既飯含而弗瞑也太學撫之而哭曰大  
人之視若有所望也得母以夫母墓未封歟庶  
母或尸饗歟諸孫稚未立歟鳩茲之經塗未訖  
事歟繁也敢不矢志以從事猶弗瞑則又哭而  
進曰宗祠之構也久而黝未新地未飭也先墓  
之隣未釋憾于我虞其有他故也族之諸祖諸

父若谷公而下五六公行誼事風而不朽之圖  
未備也大人生平所昭昭四顧者繁也請竭力  
圖之以成先志乃瞑嗚呼身家之弗圖而惟義  
是好至死靡他古稱君子不悲其身之死而憂  
其國使公得立于朝其所樹寧與此言異哉公  
在日待人務以寬柔勝臧獲有忤若外人之非  
義相干者多縱舍之太學嘗蹙然不敢分任其  
父之德公卒太學秉家政乃一惟公所行人謂



不改父之臣與父之政孟莊子之所難者太學  
易之其所爲賤公者大矣太學將奉公舉窳窳  
事乞言于作者以志其墓謂余之素與公習也  
知公爲深手續行述請爲公狀余誼不忍辭乃  
撮所述之大者載之稍附以聞見之一二其不  
盡列者體公平日不使人知之素志也若舉公  
之大節揭而行之使永永有聞于世則以俟諸  
立言君子

龍泉山草序

世間奇秀靈異之山水鬼神常祕之以供高人  
韵士之棲托其地亦待其人而後顯故自有宇  
宙以來句曲常有茅山至華陽始標其爲欲界  
之清都天水常有仇池至眉山始識其爲辟世  
之桃源有此山以待此人有此人以名此山與  
公天台賦所云非夫遺世翫道絕粒茹芝者焉  
能輕舉而宅之非夫遠寄冥搜篤信通神者何



有遙想而存之蓋謂此也龍泉之奇秀靈異甲  
于金陵去都城不數十里乃人罕有知者至沮  
修先生始得其地構別業以居而賦咏之先生  
門地之高華封秩之通顯烏奕當代迺遠與風  
疎逸情霞上常思遊名山泛蒼海以寄其邁往  
獨立之志且術解通微窮攬流畧時採花種木  
步水尋龍于以噓吸精和玩弄造化其有斯地  
也豈非鬼神特祕之以供先生之棲托而始顯  
于世邪先生龍泉山草當與華陽之詰眉山之  
記金傳余時置案頭以當臥遊因題其簡端庶  
幾得附載于金箱玉笈之間而垂不朽尤願撰  
杖屨以從先生山靈有知當以先生之莫逆我  
也有以開余不智若劉子驥之問津而返矣

庭中小山

高臺奇石鬱嵯峨幽意常疑在野過霧罷每驚  
嵐翠濕雲來忽訝樹陰多圖中五嶽真堪寫句



雪堂隱集 卷三 十五  
裏千峰遠未暮庭外臥遊纔咫尺轉憐壺嶠隔  
蒼波

申玄渚中丞納節歸里旋至棲霞予病不能  
從之遊東寄二首

方擬停車駐館娃忽傳遊展到棲霞自携北海  
中郎客獨訪南齊祭酒家礪戶青桐初放乳石  
房紅藥半含花謝公見說遊方壯還走雲門泛  
若耶

十郎茶肆尚依稀一賦郊居興欲飛樹禩龍鱗  
懸帝網峰排鳥翅絡天衣品泉但覺茶烟冷  
石偏驚酒力微賸欲從君訪僧紹自憐多病與  
心違

卜味齋七十二首

瑤林瓊樹出塵氛金縷銀泥坐夜分碧椀香流  
三萬斛綠綈經秘五千文含飴繞膝龍爲友接  
武凌雲鶴可群更羨幔亭高宴日悟真親授紫



陽君

金盃銀燭夜熹微爲唱人生七十稀瓊簡東華  
方注籍珠躔南極又增輝桂花月滿香飄几梧  
葉天高露湛衣雒社耆英今正集年年相賞莫  
相違

四壽爲梁長公梁鳳池許伯倫許長卿作二  
首

雒社耆英此際逢共歌金縷祝華封蚤知丹穴  
來雙鳳更喜平輿得二龍虞典疇咨時命嶽魯  
詩分奏日臨雍清時肯咏商山事佇望蒲輪下  
九重

薦縷裁成鶴髦新雙雙杖屨出風塵五朝文獻  
惟兄弟兩姓箕裘總縉紳芝草香浮金檢夕  
花扇隱玉壺春過從共奏千秋引歲擁衣冠拜  
紫宸

姚公理八十五沈不疑八十四同集快雪堂



顧孝敷八十二不至卽席賦此二首

香山雒社久相依任俠風流世所稀  
結客風輕千里駕遇仙霞擁六銖衣  
故人見面年年少新事攢眉在在非  
幸遇商山茹芝客幽棲衰白已光輝

碧雲天末思依依二十年來此會稀  
閉戶自無車馬客鑿坏惟有薜蘿衣  
舊知更比新知樂來日安知去日非  
檇散幸逢三壽在欣從鶴鬢挹

清輝

王太夫人八十

綺筵高向北堂開遙望蟠桃渡海來  
座上金章元貴客膝前玉斧是仙才  
東朝幾見鸞書下南嶽曾聞鶴駕迴  
蘭玉滿庭春晝永仙山何用說蓬萊

重修吉山菴記

都城之南四十里有高山焉曰吉山  
梁將軍吉



翰墓于此山所繇名也度峽東起禁龍山國朝仁廟悼熙麗妃之寢園在焉兩山之間關孔道自北而南達金陵鎮當峽之中有菴一區蓋萬曆中老頭陀募地而構焉者也往來者以此爲寄郵余爲先少宰卜萬年之藏於雲臺山道經此菴必一再托宿歲以爲常絀指三十餘年不知凡幾經過而老頭陀之物化亦已久矣余舊常買醵地于菴之左謀構屋數楹爲別業宦遊南北匆匆未暇營頃比丘寂壽以楊君申甫之募文謁余而請將就菴之後起殿奉佛而以舊供佛處館客之往來者余聞之欣然因與余弟大鴻臚羽王孝廉太復門中群從共捐貲助成之不踰年而告成事余再遊其中殿雖不甚瑰壯然軒翔爽塏具足莊嚴其前堂穿牖東向坐而望焉山之喬松蒼翠出于屋上可攬而結也乃取太白廬山之句名曰巢雲堂舊有



門庫隘出入多梗余使人具工費撤而新之高  
廣倍舊三之一往來者望之翼然爲改觀矣寂  
壽復乞余一言永其事余惟金陵城南小大梵  
刹林立相望然以地近通都游覽者衆金粉之  
色管絃之音無日無之幽寂半爲喧闐所掩此  
菴介兩山而縮轂其樞雖往來者踵接于途曾  
未嘗以馬足車塵惱薜蘿而駭猿鹿幽寂恒自  
若也常試與客倚門而送目真有如陶貞白所  
謂高峯刺雲清流鏡日鱗羽翔泳爲欲界之清  
都者春夏間雨後循山迤邐而登真有如王右  
丞所謂萬壑樹參天千山響杜鵑山中一夜雨  
樹杪百重泉者坐松下盤陀石上薄暮不忍歸  
真有如羅景綸所謂夕陽在山紫翠萬狀牛背  
遂聲兩兩來歸而月印前溪者余以故樂舉此  
向客稱說之每一遊陟望此若歸旣出其門攬  
轡登車猶徘徊而不能遽舍以去且比丘二三



雪堂隨筆 卷三 二十  
人言動皆直樸任真絕無城南諸刹游媚之習  
尤可喜也余丘壑之趣少來不淺懶病不能遠  
遊自非以先少宰一杯之故此地之幽寂安所  
寄余蹤且爲綱紀其事若此哉乃論次其所遊  
以告同志之能爲王逸少許玄度者且永永以  
示吾子孫春秋上塚經過此地當若郭林宗之  
在逆旅洒掃潔除後來者輒知爲所宿處諸比  
丘亦善付囑其子孫慎守薄伽梵木叉母高語  
飲光之示慶喜倒却門前刹竿請以是爲息壤  
之盟可也

修吾宗正過訪園居卽席賦呈

兩人同病合相憐纔一過從已霍然樹色半含  
雲際日藕香初動雨餘天裁量藥水知名久指  
點禪玄入理圓何用枚乘觀七發烟蘿如海挂  
飛泉

南考功吳君四川之巴縣人也祖母段守節



而終君援恩詔請自豎坊表揚 上許之以  
冊索詩賦二首

彤管誰書斷髮功 嵬峩門闕起雲中 報劉日向  
西山薄續史 恩從北闕通 抱節筠心明綠水 薦  
馨荔子熟丹宮 栢舟自在中河側 麟趾還宜咏  
國風

一疏欣承 聖主恩 中閨苦節動高門 清臺此  
日仍堪築漆室 當年可具論 五色祇應看紫鷲  
三聲莫更聽玄猿 泰嬖口澤貽三世 龍詔輝煌  
下九閭

通議大夫吏部右侍郎兼翰林院侍讀學士  
協理詹事府事贈禮部尚書蘭峒朱公墓志  
銘

少宰朱公之逝也 踰二年矣 先是訃聞 日有司  
具其事 上撫衽兩臺爲代 題請卹典于朝  
至是 上特允部議 贈公禮部尚書 錄其子



從義讀書胄監

賜諭祭一壇大司空全給

工料夫價治兆域以葬故事文官三品未滿考者僅予塋之半公前任少宗伯財一年被

召起今官未赴卹典乃得全給且增秩蔭子蓋異數也從義筮以今年之某月某日爲公舉大事續公遺行詣余請文其羨道之石嗚呼余與公生同里婚同外家選澤宮同籍先後三年舉進士同官翰林甫十餘年同以奉母家居同治圍爲終焉計已同受命以少宰學士纂修

神宗

光宗兩朝實錄

召爲副總

裁同上書乞休至一再不允絀指四十年來余與公之行藏若形影之相比也以故公與余最暱而余知公最深公今已矣從義齒尚幼微余誰爲公備惇史者乃按涕掇所述事並臆公生平論次書之公諱之蕃字元介別號蘭嶠先世山東之茌平人也國初以役籍太常久之用



尺伍符徙隸南錦衣衛遂家焉自公大父以上  
代有隱德服賈不仕其家起經術以身顯自公  
父杜村公始杜村公治梁丘易舉嘉靖甲子應  
天之鄉試累官至沅州守配周太宜人夢東方  
曼倩投以巨桃而生公公生而體度端凝氣資  
穎拔甫數歲日誦千言工楷法杜村公心異之  
知其爲英物也從師受易治舉子業操筆立就  
同舍生亡有與公鬪捷者未弱冠而業成補博  
士弟子旣婚以文質外祖少治王公公賞譽之  
謂其必貴萬曆己卯督學李公試錄公第二人  
廩于學宮自後試輒在高等而督學房公直指  
喬公皆置公第一喬公隨語前宮諭焦公謂朱  
生異日科名當踵公後公又嘗以通家子謁大  
司寇弇州王公以諸生試京兆敬菴許公五岳  
陳公諸公皆禮遇公待以國士壬辰督學魯公  
奉新例行選貢法公與余同受推擇公赴試



闕下歷南北二雍大司成漢陽蕭公臨武曾公  
 少司成秀水馮公陳州季公皆拔之為多士冠  
 甲午歷事南樞曹部試公以高等入棘司馬崐  
 田邢公手公卷已又占公貌數為人言以廊廟  
 材器重之矣是秋舉鄉試明年上春官連得雋  
 三月 廷試對 制策時 朝廷方以東征議  
 兵食延問子大夫公所對詳實中窾作字一倣  
 干祿字書洪武正韻讀卷者為少司馬沈公見  
 而大奇之遍示讀卷諸公眾謂策士從來所未  
 有同擬上卷進 御 上親題第一甲第

一人司馬作詩紀其事諸公和之以為 朝廷  
 得人慶四月授翰林修撰已同諸庶吉士開館  
 讀中祕書秋迎杜村公與太宜人養于邸公自  
 念起孤生取高第列秩清華何敢上負 天  
 子下負所學盟心自矢所不以清白檢其身者  
 有如日出遇諸館閣師典刑在望入奉杜村公



敬愛不違人之稱公不媿科名者翁如也丁酉  
杜村公無祿卽世公奉太宜人匍匐南歸治喪  
營葬事盡志物有加禮旣禫奉太宜人還朝  
復除原官守史局以三年滿考例得 賜封公  
上書白父杜村公守沅州去官狀 詔准與致  
仕而封母周爲太宜人娶兩王氏贈封皆安人  
明年春禮部試天下貢士公爲同考試官錄許  
獬等十有九人皆知名士獬爲榜首其文爾雅

純正藝林推服之僉以衡鑑歸公已受 命

教習 內書堂授中貴人書尋直 起居注館

編纂章奏亡何遂管理文官 誥勅近代掌

綸者多兢爲繁麗公所視草獨簡直厚重得王

言體乙巳冬 今上皇帝誕育于 東宮

詔諭朝鮮 朝議推公與給事中梁公爲正副

使 賜一品麒麟服玉帶以往公乘傳東行

所經過驛站約束下人勿苛擾旣入三韓陪臣



之接待館伴者公遇之嚴重有體而情意藹然  
牢醴餼牽亡所科索國人悅之旣抵王城遇其  
君臣造次皆中禮亡弗起敬者有以翰墨請公  
才旣敏捷立揮而付之且人各當其意朝鮮舊  
不以銀爲幣惟遇 冊詔至始開礦採銀數萬  
兩以供使者公至一切辭不受歸裝自繭紙鼠  
筆土宜外無長物以故該國上下交口頌公梓  
其奉使錄以傳前此所未有也旣報 命擢

右春坊右諭德掌南京翰林院事公資望宜北  
茲舉實公以太宜人 不樂久居京師亟欲歸故  
鄉力爲之請故也留院無官事舊傳以爲神仙  
之尊且逸者公抵任後居多暇日因構園于冶  
城之旁取安仁閒居之義題曰閒園日夕爲太  
宜人御版輿行樂其中晨餐夕醴手選甘旨以  
進訢訢然樂也已酉以左春坊左庶子兼侍讀  
掌坊 召辛亥再以詹事府少詹事兼侍讀



學士纂修

玉牒

召公念太宜人春秋高

逡巡不赴壬子晉南禮部右侍郎公謂近在里門且日夕鄉下乃起而拜

命時方錄監生

之歷事者應都比試公拔士尹邦富等若而人衆以爲允往例部越數年試儒士之通六書者疏名上

請其前五人旋得授官去故入試者

多請寄要津爲道地當事者苦之常罷試公適當試期乃群諸士于庭扁而試之與諸曹郎手

拔其牘之合法式者一切干請置不問榜出所得皆寒畯人服其公朝天宮置道錄司統諸道士他方外羽流亡敢闌入者近年黃冠請于祠部置鉢堂于宮之隲地自是遊食者出入亡禁踪跡詭祕不可詰諸道官以爲憂公諭知其狀至是立下議撤之逐其人道衆乃安舊例拜表迎

詔繇禮部西出三山門所經皆通衢可容

九軌後以民之居肆者增置蓬搭以便貿易部



因其輸稅聽之不爲限制於是層壘構架曩之  
通衢化爲夾巷不可方軌當拜表迎 詔時士  
大夫群以爲不便顧以民居且久動則易譁置  
莫敢問也會公攝工部篆力議廓清之因並除  
都城內外之侵占者檄下旋具疏以 聞

報可已而兩京之蜚語上

上置勿聽公

因是上書求罷

上溫詔趣公視事得竟前

功明年冬太宜人棄柩捲公時年且幾六十矣

爲太宜人治喪營葬事亦如喪杜村公時旣闋  
有爲公趣裝勸駕者公笑而謝之丁巳內計言  
者猶以前事齟公賴 上知公言不得行初

余以病先公一年還里公時時過從相勉以吾  
兩人素少宦情宜共協箕穎之好至是公益感  
世路之嶮巇不欲復問人間事矣卧東山者幾  
十年至 今上御極之二年壬戌錄用舊臣  
始以纂修 召公人謂公學爲大儒仕爲元



老委蛇一出不叅揆席且正卿座矧兩遇  
單恩例有應得彝典公卽情鍾丘壑寧愬然不  
爲祖考子孫一移其志乃再上書辭再奉

溫綸敦趣堅不肯赴人乃知公之勇退真有貞  
于介石者亡何而公病且及于大故矣嗚呼痛  
哉公通籍三十年什三在朝什六在野與諸  
薦紳處閭閻侃侃是非可否未嘗輕以徇人居  
長安無事閉門以文酒自娛避遠要津無所干  
謁出入里門游道甚廣而郡邑公庭之跡可數  
也人皆知公坦蕩簡易不立城府生平上奉尊  
長中偶兄弟外接賓友下御童僕終日怡然不  
恒見其疾聲厲色不知其居官立身和而能介  
致乃若此公天性孝友奉二親先意承志朝夕  
惟謹未第時開門授徒所得脯挺及都講餐錢  
輒以奉二親佐朝夕費杜村公每語人必稱其  
孝友于二弟旣貴杜村公遺田若干畝悉推以



予弟同產子女之婚嫁率倚辦于公公一一資  
助之無所靳弟婦幼寡撫之終身叔少怡公葬  
未善公爲之改卜孫不能婚公擇良家女爲其  
室其篤厚本支多此類念前陵縣令李公夢相  
杜村公同年友也死而妻子無所依斥閒園餘  
房居之翠岩張叟老而貧且病公念杜村公嘗  
主于其家以園右房一區使僑寓焉且更以訾  
助遣其女他若旦夕緩急之走公而得所願更  
僕未易數也性喜賓客座上市常滿隨所有豐儉  
飲食之連日夜不倦有求公翰墨者就酒間拈  
筆揮洒人以爲快劉穆之之百函俱荅王茂弘  
之四座盡驩不是過也間有語及遷除及屬託  
公事者輒以大白浮之甚則正色峻辭以拒以  
故人雖謂公爲親已然亦不敢干以私昔人所  
謂使君將我入青雲不使復論地上事者公蓋  
有焉自解南禮任後益拓治閒園已又構小桃



源于謝公墩之北龍江關有蓮蕩公築圩種柳  
葺居臨之遂爲勝地公時時往來寢處其間居  
官所得俸入及請文潤筆之贄隨手揮之不屑  
爲居積計身物之後檢其遺產餘訾田無二頃  
囊止八金蓋實錄也公賦才敏贍爲文拈筆數  
千百言已構文不加點晚年爲七言律詩若和  
人所咏滾滾數十篇探囊以出音必調暢字必  
穩愜作者尤歎服以爲工有詩文集數百卷藏  
于家公幼卽好書初從文長洲爲楷法已進而  
倣趙集賢顏魯公上暨黃庭破邪之屬皆善得  
其意後又爲擘窠撮巾大書持楮筭求書者闐  
門無虛日公揮翰若飛頃刻而盡余嘗謂自臨  
池以來書之敏疾未有如公者也公議論必本  
濂洛關閩而不談理學交與不諱緇流羽客而  
不語禪玄文章不忌調笑詼諧而不喜優伶燕  
樂不避抃舞歌呼而不設鼓吹所摩挲賞度者



惟古之鼎彝尊罍法書名畫博求遠訪傾橐致  
之入其室者以爲米之海嶽菴倪之清閼閣未  
有踰勝此者蓋杜村公素精賞鑒公善繼其志  
益篤好焉以故所蓄常多博古者爭走其門公  
逝而一時之文物風流依稀盡矣嗚呼惜哉余  
嘗竊窺公見事敏而應機捷彊直自遂人不能  
撓倉卒用之以當大任必蔚然爲時材臣徒以  
官文學侍從之班 朝廷無事胸臆約結無所  
用之乃汜濫于辭章從橫于觚翰淋漓于杯棊  
及其垂老游倦益不復以世務嬰懷然觀其葺  
治園圃籬落藩溷位置有方栽植灌溉節候不  
爽未嘗不服其綜理之精區畫之當以爲使當  
柄寄必非以人之國徼幸者乃以濟川之利甘  
爲遯壑之藏可歎也當公在 朝日交戟之內  
門戶旣開士大夫足趾一搖俄而分左右袒時  
亦有大聲色以感公者公屹不爲動甘以事齟



齟于時 聖人中興弓旌之使責相望于岩  
穴近臣之在外久滯者一旦邁會立取大官公  
以大元居詞林歷仕承郎垂十餘載久之方  
召 召又久之以不抵任不遷資在公後  
者超乘而上而公竟以三品終然公之物後超  
然免于論評難進之節益炳然在人耳目  
明主方甄叙流品慎重名器生旣以禁近  
召公物又以優異卹公于是知公之守官者正

而

上之待臣者厚也九原可作公宜誓與

世世子孫圖報

主知于罔極矣公體素彊

碩善飲噉且素按方藥厚自攝養六十後壯健  
常如四十許時旣病而神明之用不衰猶對人  
寫字賦詩不輟將瞑呼從義從容緩語人生聚  
則成形散則成氣一去來間耳賦三詩皆見道  
語公素不論三教中事茲乃出妙理于續息之  
餘一似大有悟者三孺人與從義環立以後事



問不荅悠然而逝於戲其生有自其出有爲公  
所繇來者遠杜村公夢先爲之兆矣余雖皦皦  
然自謂知公其孰從而測之公之卒以天啓甲  
子之十月初七日距其生嘉靖戊午之三月初  
一日享年六十有七元配王安人廣東瓊州府  
知府少冶公女孫孝廉孫冶公女蚤卒繼配王  
安人太保兵部尚書石岡公女孫大名府通判  
小岡公女亦先公卒副室三孺人吳氏李氏王  
氏子一卽從義李孺人出今受廕爲國子生聘  
李氏淮南太師文定石麓公女孫某某公女女  
二一爲繼配王安人出適許延祝國子生尚寶  
卿石城公孫河南裕州知州倫所公子其一王  
孺人出未字墓在牛首山西烏石之原公所自  
卜爲壙三左右窆兩安人一以待已古之所謂  
同穴者如此公盖有所受之也系之以銘  
銘曰金陵王氣鬱爲人文名世出焉接武奎躔



首魁軒對翰登于天侍從承明著作之庭奉橐  
甘泉南省掄材北扉視草望實翹然 詔諭畚  
邦周旋中禮異域所詹黑水之碑雞林之字美  
愛而傳洊貳文昌驅邪籲俊衡尺罔愆疇爲路  
梗廓清如砥周道便便鼎鉉在前急流勇退珪  
組弗牽北闕上書敬謝 明主莫副招延時  
至則行避無怛化神穆以恬 帝睠舊臣備

茲愍渥以煜幽挺延世之賞春秋冠帶俾祠其  
先 天語煌煌星輝日麗宗伯之阡不朽者  
名不泯者德胤祚緜緜青簡長存斑管累紀于  
萬斯年

喻體四首

絕代元非粉黛功天香不住綺羅中湘江瑟鼓  
人誰見涇水書傳路未通龍女獻來珠髻隱馬  
郎婚後錦幃空無端賦起高唐夢暮雨朝雲暗  
楚東



抱瓮徒勞灌溉功，勾萌消息有無中。暗香忽向  
江梅發，芳絮俄從岸柳通。紅藥蕊含先辨色，綠  
蕉陰覆早知空。一聲長遂清霜後，銷盡繁華舊  
圃東。

繡牕初倦錦鴛功，暗想春光澹蕩中。有意燕鶯  
窺戶入，無言桃李得谿通。三更雨後村村有一  
夜風來，樹樹空狂殺。玉驄閑踏遍，浪隨蜂蝶過  
橋東。

七寶修成幾歲功，青天碧海夜方中。寒生玉杵  
無人共，光泛銀河有路通。影落萬川輪自攝，照  
窮千里鏡常空。何人愛譜霓裳曲，徙倚蟾輝太  
液東。

顧孝敷年八十二，談少年事疊疊有致賦。此  
曾從六代想風流，老後多情尚未休。松栢西陵  
江上馬，薜蘿南澗雨中樓。請纓漫憶丁年事，秉  
燭疑爲子夜游。何事維摩方丈室，香鑪茗椀共



淹留

秣陵三十二景詩序

振玉先生今年七十有六吾先子之姻友也尊甫仰山公與先王父稱老兄弟先生與先子投分甚篤視余交在紀群之間其長子卓哉又與余兄弟稱莫逆絀指中表前輩中三世通家如先生者今不一二遘也先生生賦異才兼有高韻幾如古之所謂遠興風疎逸情霞上者綺歲爲博士弟子擇山寺之清遠者讀書其中累月不一入城市金陵有六代之風流輕車細馬錦帶香鞵使人目玩神怡往而不能返者何限先生故嘗一染指其中尋且超然遐舉曾不爲其繫縛也垂老以家政畀諸子棲托山寺迥別人群間以杖屨登涉之踪揆而爲咏惟卽目境所窮心境所會者用以發山水之靈而領其趣不規規于聲律字句間以爲工拙視世之苦吟斷



髭走龔誠不欲以彼易此世有具伯樂九方臯  
相馬之識者得其天機略其牝牡取先生之詩  
讀之吾知其未有不欣然把臂入林者也因請  
先生梓其所謂秣陵三十二景者以詒同好使  
知東南菰蘆中乃有如此人因并題數語以弁  
之

王惟士制義序

夫文章千古之事至從場屋于有司又所謂將  
人使入青雲中者衡之以鑒售之以舉惟鑒者  
不舉舉者不鑒士乃始以文聽絀信于必然不  
必然之間其畸也或侈一第之榮不復自貴其  
丹青之譽視千金之享不足以當一日之曜蓋  
士之捫心而不能自決者多矣代間人心之愛  
憎眼之青白口之雌黃其以移易妍媸溷淆朱  
紫無所不得逞而獨不能用之于文文之品一  
定雖舉未卽行如美玉之在塵沙匪惟不能霾



沈淄涅之也其符采陸離且因之以蘊奇而表異蓋余觀三十年來士以文有聲場屋究未有不摩天去者操其品以待鑒與舉之合安在其不可自信也余友惟士賦才最高綜學最富抱識最遠王氏代以經術名家惟士少游外父澹園先生之門師承又最易發而爲文沈鬱淡雅微妙玄通如瑤林瓊樹迥出風塵金樓玉堂森列天表人之讀之謂惟士之文必爲世秉先登之羽乃世之秉羽先登其文未必皆能爲惟士者也乙卯南雍之役余實以此推轂惟士迄今猶然未售惟士亦心疑之余則謂惟士之文至今日其品定矣有司有勝余者見必鑒鑒必舉舉必不令復有人焉先惟士取前茅以進卽有不及余者夜光之璧暗投于道路雖素無根抵之容亦未有終于按劍相盼者也惟士不見澹園先生久困公車一出而名動天下淹速又奚



雪堂隨筆 卷三 四十  
論哉惟士之文具在玄感風雲摩天之期至矣  
昔弇州司寇嘗語魏懋權曰子必不負吾吾必  
不負吾眼余于今日以此舉似惟士惟士其摩  
厲以須之

勅贈文林郎南京山西道監察御史和宇張  
公墓誌銘

潼川多甲族張爲之冠和宇贈公生有雋才纘  
其父觀察公之業受經博士誦旣通駸駸踵祖  
父以科第顯矣無祿卽世子侍御善繼公志早  
成進士尹溧水以治行高第聞 上徵拜爲

監察御史涖南臺先是治邑滿三年考最 國  
家下璽書褒勸之按部南都值 大慶覃恩  
公以子貴得再拜 命贈秩如子官侍御奉

上寵靈將大展公墓鏤石納公墓道以垂  
不朽手自爲狀屬起元志而銘之起元芑侍御  
宇下辱在世講誼勿敢以不斐辭也謹據狀大



書爲公志公諱世隆字叔治和字其別號也張  
世居潼川之義龍山自仲珊公始仲珊生桂芳  
桂芳生文繡文繡生伯璣伯璣始以明經起家  
爲城固學官子翀舉進士官禮科都給事中張  
之門至是始大以言大禮忤  
世宗肅皇帝

意廷杖之謫戍而隕天下憫其忠都諫公生州  
守公肅肅生二子皆以進士舉一爲觀察公正  
道一爲黃門公正學公觀察公之長子也觀察  
公配王孺人而舉公公生有至性弱不好弄稍  
長與弟游里塾歸而起居父母前如成人偕弟  
出入怡怡如也觀察公心異之曰是兒不忝忠  
孝家風矣公賦才慧敏操筆輒數千言補博士  
弟子試必先其曹大司馬青螺郭公大司空鍾  
梅黃公先後督蜀學政皆高拔公後當事者遴  
三巴高才生萃于錦城群試之公與方伯莊衢  
康公大參稚霍朱公計部韞初劉公稱莫逆同



以才名著逢掖間咸謂公視一第如拾地芥乃  
久之不售人有不能爲公測者公意氣軒軒霞  
舉善飲且雅有山水之好郡多泉石囊書杖策  
悠然忘返常與友人探奇造險得唐人詩刻于  
石壁苔蘚中浮大白賞之觀者謂公高逸度越  
流輩自康樂供奉以來未有與其奇者令公得  
早脫穎而出長卿淵雲之業豈足道哉乃僅僅  
以一青衿終何命與才之舛互也公才高而內  
行甚備觀察公筮仕爲廬陵令王孺人卒于邸  
公時年甫十歲哀毀踰禮水漿不入口者數日  
觀察公撫而慰之始勉進米一溢見者謂憂能  
傷人濬沖死孝不意童子中有之比奉檟歸治  
葬事王父州守公王母金太宜人憐孫幼每見  
其哀號輒摩頂以諭旣葬一夕公夢入母壙立  
柩前而衽爲濡也覺而驚曰豈墓有水邪亟啓  
視之果符所夢人以爲公至孝神告之矣觀察



公累遷外臺備兵于浙之台州病劇公聞之亟携其弟往省侍時公方感寒疾川水發風濤漲天從父黃門公力止之曰而父事未可知若奈何輕以病軀試險公泣而跽曰兒之方寸亂矣立起登舟破冢而出布颿亡恙不一月至台則觀察公已就木矣公憾不得奉承訣辟踊號呼隕絕者至再四郡人士覩公哀戚狀亡不爲公累歎且曰孰有人如我使君者乎哀今之不祿天道夢夢有子而孝使君爲不亡矣已歸里營治兆域誠信備至里人稱之始觀察公繼配以馬孺人三配以徐孺人公事繼母如母馬孺人卒公處苦塊如喪所生徐孺人旣失觀察公有遺腹子公上奉母而下護視其弟至成立徐孺人內安鼎養白首而無孤嫠之戚則公之以也王母金太宜人在堂公晨昏定省得其驩心太宜人幸有孫不啻觀察公之在子舍迨棄柩椁



時黃門公守官居京師公視含殮纖細必中禮人謂太宜人得公而瞑不減于黃門公待同產二弟庸愛靡間宗族鄉黨親而譽之性慷慨勇于赴義有以緩急告不旋踵以應里俗諱疫遇病者避弗敢視公于友人病躬爲裁藥量水坳具衣棺以殮它如漢人所謂憂而不手手而不憂者不可勝數于此人尤以爲難東山浮屠歲久而圯郡人士第者減于曩時公力佐黃門公修復之至傾橐不倦公之忘身狗義皆此類也公體貌魁梧天性坦蕩法宜得恒享觀察公大用未究宜厚發于公且三巴名士宜應網羅者絀指計之公未嘗不在甲乙其當貴富而壽何疑乃丁酉秋公挾筴試有司爲文以祭魁星隨有燈花結爲魁形之意公大喜自負以爲袞然舉首之兆也亡何瘍發于頂展轉弗療而公卒矣病革之日令左右侍者誦西方名號公口說



得皆出世語公生平不佞佛屬續乃佹得之盖  
若有宿契然者時年僅三十有八嗚呼痛哉盖  
余初讀侍御所爲公狀謂才貌如公天何奪之  
遽邪輒爲之泫然而流涕已三復于公述作之  
際乃知天之所以小抑公而大信公者其意微  
公實可亡遺憾也昔王長史自悼曰如此人曾  
不得四十彼感促景之易渝悲修名之難立宜  
其捉麈尾而太息公雖蚤世不第微遜于觀察  
公有侍御顯而揚之秩比封君名播

天聽

藉令宿齒何以尚茲世之鶴髮鮐背泯泯無聞  
者豈少哉曾何得上而與公埒且麟祖鳳癡終  
爲上瑞人轉以其不恒在世日爲希有又何至  
下而與猿鹿爭修短之數也故曰人不可以無  
年尤不可以無子公以侍御爲之子舉其生前  
之蘊而未試者大沛厥施卓然爲

天子耳

目臣而公因以泉下之身對揚

庥命且侍



御望峻朝端游登崇臚所以顯揚公者尤未有  
艾計公身自樹之與侍御之爲公樹者其歷孰  
長夫是之謂死而不亡者壽公真可亡憾于人  
間侍御齋被而祠春秋亦可因是自釋其終天  
之痛矣公之卒以萬曆丁酉之七月二十日其  
生以嘉靖庚申之七月二十四日配羅氏湖廣  
桂東令羅公附賢女以子貴累封太孺人子一  
卽侍御錫命舉萬曆丙辰進士今任南京山西  
道監察御史娶殷氏雲南鄧川州守殷公才女  
封孺人女一適庠生賈世填陝西鞏昌別駕賈  
公文範子孫三沈廩生娶何氏文學顯祖女汲  
庠生娶王氏文學啓胤女灝聘傅氏湖廣潛江  
令相殷女女孫一適黃纘文學承祖子曾孫一  
光祚沆出墓在郡東山之陽葬以萬曆庚子之  
孟冬距今二十有七年墓之木旣已拱矣始列  
貞珉而志之紫泥再被高披日月之光黃壤猶



生頃改松楸之色真盛事也昔常璩志華陽譙  
周傳益部如侍御之以公顯者可多覲哉起元  
幸得執筆從事謹拜手而爲之銘

銘曰連城之璞席珍可售韞而藏之以貽厥後  
載考之鐘列虞可傳發而皇之以光厥前既有  
是父宜有是子豸繡峩峩古之柱史旣知其子  
因視其父龍誥煌煌今之掌故井絡垂精毓此  
靈區世大其門駟馬高車鬱鬱佳城九九宰木  
君子攸寧以綏後祿音徽未泯遺德可師芒芒  
九原如或起之

東顧濱湖

弟夏來脾氣頃弱中暑又現異症偶然有感于  
佛家人命呼吸之說遂于諸事一料理之當晴  
而買繖當暑而買炭必有之時必用之物六十  
老翁理自當爾非大驚小怪妄有舉動也使果  
大驚小怪則必倉皇恐怖不能談笑而爲之矣



今求官者未必得官也而作一品二品想求財者未必得財也而作千兩萬兩想彼不爲妄此乃以爲妄乎劉道原有云陶潛預爲祭文杜牧自作墓志其人豈涉生死之流哉偶然爲之弟不以爲異兒輩不以爲疑乃無端使老兄聞之爲我作悲作喜真可笑也更有真游九事一書藏之胸中未出容寫示兒輩當呈兄覽恐兄更以爲大驚小怪而謂其妄發也閑坐無事書此博兄一噴飯寄字丈達者也試舉此以問之何如

梨園顧叟萬曆中樂部第一人也先少宰絕愛賞之去今三十餘年偶來相見年已七十矣共話往事不覺悽然賦此示之

老去誰爲唱渭城開元供奉久知名回思北海開尊日轉憶西州感舊情郢上陽春無和曲江東子夜有新聲白頭共語梨園事零落霓裳譜



雪堂詩集 卷三 四九  
未成

秋日載酒同兒輩訪芳槐丈父子及其從子  
捫蘿君反叨盛款賦此以謝二首

紫萸黃菊媚秋天清夜西園綴綺筵厨味自傾  
常令客杖頭誰送阮家錢一門中表娛今夕四  
姓衣冠似往年樗散幸餘頑健在琳瑯滿目倍  
欣然

同蕢金陵十斛春高軒瀟洒出風塵醉鄉共記  
東臯子卧榻偏容北海民物外神姿多似玉鐙  
前斑鬢已如銀烏衣子弟稱全盛把臂林中更  
幾人

家大鴻臚携具遯園招同倪王二君四孝廉  
卜婿共集時芙蓉菊花正開卽席有賦二首  
亭臯木葉下清秋采采芙蓉此勝遊照水明粧  
臨寶鏡倚風飛珮下瑤樓霜多倍覺紅顏好露  
冷偏含翠黛愁同咏謝家兄弟在共看初日麗



芳洲

病軀何意更悲秋  
遍插茱萸好共遊  
載酒可須元亮客  
登高不賦仲宣樓  
黃花籬傍清霜冷  
紅葉牕鳴暮雨愁  
莫向江天頻送目  
蒼茫宿莽在中洲

送許聲凡遊中州二首

有序

聲凡詞丈金陵之名士也雅負雋才夙懷遠志既窮勝覽遂旅英躔周府上維大王耳屬

高名心儀嘉客特厯專使羅而致之君子是慨想鳴鑾珮玉之游亟命仗劍囊書之駕三都作賦獨裁吳苑之雲千里懷人同望梁園之月元等言敦宿好肆咏新篇投之左驂倘可助輕裝于行李出其上駟庶幾叶高唱于班荆

天高露冷鴈行疎  
獨爲游梁駕襍車  
過里自應虛左席  
何門不可曳長裾  
兔園雪滿堪裁賦  
鳧



渚風迴好寄書共羨鄒枚稱上客漢廷還擬薦  
相如

自從江左擅風流握裏明珠肯暗投講業舊都  
秦博士授餐同姓漢諸侯清風朗月思玄度穎  
水箕山感舊遊何處懷人情倍切夢迴鐘動景  
陽樓

李廣霞工部司權蕪關書貺見存賦此答謝  
二首

東臯政績冠揚州題柱聲名動冕旒蘭省含香  
推起草蕪關司權藉持籌芙蓉露滿臬磯夕楊  
柳風踈牛渚秋聞道六箴新擬就雙鳧還繞鳳  
凰樓

迢迢江上到雙魚珍重開緘把素書白露乍寒  
宮杵動丹楓初落塞鴻踈蓬蒿滿逕容高枕蘭  
蒨同心憶索居爲謝故人勞問訊報瓊無地欲  
何如



高秋病骨稍蘇過訪孝敷八丈與長君與極  
欣然留欸辭以異日賦此投贈

華堂十載斷經過想像清幽入夢多起色乍隨  
秋爽動高情無那客愁何龍團試煮燒紅葉鳩  
首徐扶扣綠蘿笑指庭前雙玉樹可容老子共  
婆娑

沈五陵丈年八十四矣慨然命駕訪米觀察  
于京師余高其義壯其志而惜其別也賦此  
送之並寄觀察二首

楓落吳江鴈正飛北風吹淚濕征衣相思命駕  
攀嵇少乘興廻舟訪戴非病起綠樽腰帶減愁  
多青鏡鬢絲稀卜居海嶽成言在坐撚梅花待  
客歸

不甘雌伏要雄飛大耋猶牽短後衣愛客獨言  
公子是和歌寧顧酒人非過河鴈度霜華冷遶  
樹烏啼月影稀杜甫最憐垂老別錦城雖樂不



如歸

題典客許長卿小像

晴如點漆旣以爲杜弘治姿如行玉又以爲裴  
叔則學本承家文堪華國清風朗月亶玄度之  
可思問舍求田豈元龍之見客侍帝宸則長史  
之班高隱聖世則巢父之道叶身雖退而行益  
彰髮已蒼而神不竭吾是以嘉其繩祖武而裕  
後昆宜其福備五而年踰百也

煎茶圖

石鼎沸松濤茶香溢人齒欲與共高吟誰爲玉  
川子

明文林郎湖廣荊州府歸州巴東縣知縣允  
吉姚公暨元配邢孺人合葬墓志銘

巴東令允吉姚公萬曆中與其弟觀察公同以  
茂才異等著聲逢掖間余幸皆得締縞帶交每  
歲當都比流輩語先秉羽而登者指必首爲公



兄弟絀乃觀察連得志于有司官至方面而公  
不售久之乃需次受推擇縣道續食貢闕下  
冉試之隨牒授揚州之司訓五年晉而爲巴東  
令巴東在楚西南徼去金陵數千里公捧檄車  
車赴之涖任亡何以勞欲疾作時伯子孝廉已  
舉于鄉偕計吏上公車矣公遂堅意亟請于上  
官投綬而歸踰二年疾累作弗療及于大故嗚  
呼痛哉先是元配邢孺人棄柩椁于學宮已卽  
分山之祖塋瘞矣孝廉筮以今之某月某日奉  
公啓孺人之窆窆焉手自爲狀踵余門稽顙屬  
余爲之志余久從公父子兄弟游稱莫逆季弟  
又與孝廉同榜舉今又申之以婚姻誼固不得  
辭也乃返其幣按狀撮公與孺人行事之大者  
書之公諱履旋字允吉今人亡慮皆有別號獨  
公兄弟以字行姚之先籍浙江之仁和國初  
徙富戶填實京師公家在選格中遂隸上元數



傳至鴻臚公澍以工詩賦出大司寇顧公之門  
與海內諸賢豪長者相結闢園曰市隱引諸名  
士觴咏其中客來游金陵者以得把臂入林如  
登龍門有二子皆善承公志長爲白門公之裔  
以次子觀察履素貴贈奉直大夫尚書比部郎  
白門公配陳宜人舉公兄弟公其長也公生肉  
敏慧而外凝重不輕語進止若成人就塾師授  
書日誦千言且善屬對宮講雉山邢公與公家  
比鄰而居時過白門公座間目公噐之謂白門  
公曰郎君英物也余有女生時得佳夢占當妻  
名士請以字郎君遂委禽焉卽孺人也公旣長  
習博士家言清綺絕倫同舍生皆左辟讓之已  
試補弟子員自是累以文待比必先其曹食餼  
廩余嘗得公所奏牘讀之詞不繁而意足穠纖  
合度高下中音當文體代變之後守震澤毘陵  
之法而不澗者惟公有之世有廬陵知貢舉必



有所以處公者矣乃入棘者首尾幾二十餘年  
竟使公抱荆山之璞而不獲薦士論搯擊爲公  
惜之已未以貢上京師 廷試卷先後爲中州  
孟玄鉢句曲孔太華二太史所賞拔名在高等  
銓司以近例注公秩儒學訓導得揚州維揚去  
金陵雖越大江地不過二百里彼此士人往來  
者衆多士素知公爲江左名士爭執雉暱侍公  
惟恐不得出公之門下是懼公絳帳財啓青氈  
已溫邊笥五經鄭圖三絕經品題者便爲佳士  
親模範者快得人師琅玕照先生之槃芝蘭滿  
君子之室矣 朝議修 兩朝實錄 詔省

直府州縣纂志書實錄以上揚州一郡督學遂  
以昇公公紀載詳實有體人服其有良史才臺  
試諸博士以制舉義獨命公作狼山關武隋隄  
弔古二詩皆異格也自是邑長令郡國守相監  
司署官評輒書公上考按部督學二使者御史



大夫廉公學行僉以爲可師六館而宰百里數以疏薦公于朝癸亥公是以有巴東之

命巴東近巫峽踞山俯江而城地里曠而民夷錯當楚蜀孔道賦寡役繁雖小邑名最不易治公抵任慨然嘆曰盤根錯節可以別利器邑何遽不可爲也手版見諸上官置驛馬迎送往來之賓客幾亡虛日黔事起征四方兵往援之道經邑公饋餉有方士亡譁者邑舊有寇萊公祠甘泉久湮公疏復之使民亡遠汲江水衆稱便焉坐堂上理事間則問民疾苦退而擘畫利弊所當興除如釐積書蠲恒例蘇舖戶減獄訟將次第行之而疾大起延醫治之未有效公謂邑非可以卧治者不去且以身病而病吾民幸有子可繼吾志決計東歸上官諭留百姓遮道挽公舟弗可得也歸靜偃一室孝廉朝夕奉湯藥惟謹親故候公起居問眠食以占公愈者屢常



接于門其熟公行事者謂公位未配才孝廉雖策名猶未及揚王庭以上命爵秩之榮施及父母公雖病天必且畱公以食其子之報壽未可量也乃公竟不能待矣嗚呼痛哉公天性孝友事白門公陳宜人得其驩心友弟觀察公以經術行誼相師終身靡間觀察公備兵瓊管有黎變公念弟走萬里跨海訪之人以緩急告者常傾身爲之計與朋友處剴直而忠亮不爲脂膏爲諸生時一大長者延諸名下士論學談藝一時多鄉風就之公意有不合不一往也外曾祖爲太僕陳公外父爲邢公祖父爲鴻臚比部公同產弟爲觀察公入室禮樂觸目琳琅公幼所稟承長所薰炙皆與人異四方重客若文壽承張幼于周公瑕張玄超皆大父行海內知名士公少以世誼氣類接之呼爲小友交以忘年公之文雅風流所從來遠矣公覲覽甚富博



洽多通習當時之務談天下事如指掌薦紳先生耳公名多願倒屣致之嘉禾大司空丁公命二子師公館公署中諸爲地方畫永利若坊廂房號等事與士大夫往復議之入必借公前箸海州大鴻臚張公署京兆事纂孔門傳道錄手推公載筆其爲名流所重如此詩賦師祖鴻臚公典麗雋永參軌唐人中年與同里參岳何公公露運使張公孚之輩互相唱和有詩若干卷余嘗序而板行之自篆籀變爲真草六書遂爲絕學吾鄉如真李先生達追倉史深究厥義所著撫古遺文皆鍾鼎科斗古文奇字學士罕有知者公獨受其傳較讐補益半出公手說者謂先生之有功卽子雲之侯芭不是過也書法師歐陽率更間出入褚河南鐵畫銀鈎瑤臺青瑣得其遺意繪作墨梅近師秋澗公遠師王元章幾有飛白之稱出藍之譽縑素一出人爭什襲



焉嗟乎以公之才行質有其文乃爾令其早得時而駕含香粉署奉橐甘泉啣咫尺之書筦方州之寄詎不所在著績與太僕宮講諸公後先競爽副其才志乃長駕跼于短馭宏意束于促景旣抑之以吟首藉又抑之以尹猿猱且扶影不長榆暉遽戢令公終齋志以物也人能弘道無如命何豈不痛哉然公學則通儒仕則循吏藏書遺草文苑稱之所謂第五之名何減驃騎孝廉美秀而文蔚爲國噐生子如此足散人懷今且跨騰風雲展公未盡之蘊公得孝廉而名益彰其又何所憾于人世矣孺人爲宮講公之幼女公諱一鳳舉嘉靖辛丑進士第三人孺人幼婉嫕閑內則公與所生母愛之不輕字其歸公也以貴家女作配名士金翠綺羅冶容奇服乃世婦大家之常所居爲城南韋杜閨閣尤以華侈相高孺人獨勤修婦職孝恭敬儉與公白



雪堂隨筆 卷三  
首相莊上奉舅姑中侶姊妹下御臧獲鮮有不  
當公意者至解珮脫珥助公爲德于鄉黨宗族  
間其內行尤著舉諸子保愛之甚至以丸膽墨  
帳佐公義方是以公父子得壹意就其業無煩  
卹憂公晚而宦遊孝廉壯而賓興則孺人之大  
有造于公父子也盤龍明鏡徐淑之偶秦嘉鹿  
車行汲少君之育鮑永與公先後而逝同見其  
子之貴真可謂一德攸行克昌厥後者矣夫人  
盡夫婦也如公夫婦者可易得哉余姑掇狀之  
一二以識公與孺人孝廉繼觀察公大顯于時  
馳榮父母異日者鸞臺鳳閣之絲綸螭首龜趺  
之黼藻不朽之章當在于是余今日請以厓畧  
紀日月可也公卒以天啓丙寅之正月初九日  
距其生嘉靖辛酉之六月初八日享年六十有  
六孺人卒以天啓壬戌之十月初七日距其生  
嘉靖甲子之三月二十五日享年五十有九丈



夫子三長麻卽孝廉舉天啓辛酉鄉試娶趙氏  
嘉祥諭少東公女次廊聘蔣氏太學蓮州君女  
娶杜氏太學春湖君女次庶娶王氏文學勉齋  
君女女四一適李一枝少府少東君子一適程  
允慧處士澹菴君子一適李長仁庠生太學絳  
岩君子一適呂伯潤少府仰山君子孫六緇娶  
廖氏太學傅生君女絃聘宋氏太學耀南君女  
維幼未聘皆麻出纁纒緣俱幼廊出孫女四一  
許字余孫蓋詒以恩詔廕爲國子生一許字  
大理予覺葉君子應先二幼未字皆麻出曾孫  
女一緇出墓在城南依祖而塋公所命也系之  
以銘

銘曰夫曰賢夫婦曰賢婦絙錦瑟而鼓瑤琴爲  
人倫之粉斧父曰慈父母曰慈母懷明月而產  
夜光爲天寶之藏府龍誥煌煌九原如生鳳卜  
將將千載若睹溯白旒之翩翩擁翠旂而容與



雪堂問答 卷三  
於乎斯公與孺人所以合靈氣于偕藏而永固  
存于終古者邪

重刻省身錄序

華嚴經云若人欲了知三世一切佛應觀法界  
性一切惟心造夫以法界之三千大千重重無  
盡其量數至不可說不可說轉而造之不越一  
心矧世間福緣如普門品所載又寧有心外法  
邪但種善根必招善果如桴鼓如谷傳聲亡  
弗應者其或爲善未必蒙福不爲不善反以蒙  
禍此非現行之善果未圓則宿種之惡果先熟  
非契經之言有不驗也雲谷老人常舉此似表  
了凡司馬司馬行之有效著省身錄一編以示  
世人余讀而韙之雲谷蓋因孔公之言特標唯  
心之義使人知心外無有一法可取心外無有  
一法可得見有可取卽取自心見有可得卽得  
自心水中之影鏡中之像我自有之還爲我現



非在外也。要其至，卽鑄大地爲黃金，攪長河爲酥酪，須臾而革。凡入聖剎那而變，有歸空朗萬劫之昏衢，裂千重之見網，自是已分內事。區區世福種麻，得麻種粟，得粟有不旋至而立應者哉。余友金莘甫氏精思大道，弘闡玄風，常舉此書以示學者，慮其行之未遠也。手書授梓，以廣其傳。屬余一言以弁，余惟省身之說，肇于孔門之曾氏，而老子又云：吾有大患，爲吾有身；及吾無身，吾有何患。金剛經又云：所謂大身，卽非大身，是名大身。余謂三教之言，同條共貫，知一切唯心，而後爲大身之至知；一切惟心，而後爲無身之至知；一切惟心，爲大身爲無身，而後爲省身之至學。者試從此叅而求之，若謂心外有法，可取可得，生濃豔根，起貪癡障，如是又將以灌頂之甘露作腐腸之鳩毒，負雲谷多矣。請以是發莘甫氏重梓之意，爰書以弁之。



皇明儒林郎光祿寺大官署署正禹門陳公  
暨元配 勅封安人馮氏合葬墓志銘

嗚乎是爲光祿署正禹門陳公暨配馮安人之  
墓公以貲爲郎事 神宗皇帝列在禁近以

勤恪能其官 上下壘書褒寵之賚恩父母

若妻如例將議增公秩而公以倦游乞歸時公  
年方踰艾人謂公休沐非久當詣 闕下而公

遂堅卧不出如是者十餘年有安人之戚公悼

傷之因感疾亡何繼安人逝矣公子太學中正

有美才不幸早世公之亟請歸田以此至是舉

公大事手續公安人遺行屬余以銘者玆玆之

孤孫文學九行也嗚呼痛哉按狀公諱汲字伯

用禹門其別號也晚又更而稱躍龍先世系出

潁川已南遷浙之仁和 國朝永樂中有諱關

者嘗應 詔徙金陵再傳爲寧乃占籍南光祿

寺自茲以上或仕或隱代有醇德以義門稱又



數傳而至贈公萱則公父也初配朱繼張又再  
娶公生母王實舉公公生而體貌修偉儀止祥  
華稍長從師授書已治博士家言駸駸脫穎出  
矣贈公善治生起家素封不欲使公刺促逢掖  
間奉例挾筴遊成均一時目屬公者咸噐重之  
公奉贈公庭訓朝夕惟謹居恒自勵幾有所樹  
揚親之名贈公逝公代秉家政始穆然思曰父  
有遺產余實承之誰代余司管鑰者當此時猶  
然坐陳觚事散儒非所以成親志也與馮安人  
以勤儉日夕相儆戒公旣工計然之筴又知人  
善任使所署爲紀綱生殖者能盡其力而安人  
不難布衣椎髻操作井臼佐之用是產日益隆  
隆起子太學之生也敏慧善讀書公與安人撫  
之謂非凡子比就塾延名師切劘成其噐而太  
學遂以通經試爲博士弟子尋以高等廩于學  
官已進而升六館人謂其旦夕且得志于場屋



所爲副公志者可跼足須也而公則時時撫几而嘆謂吾親以岩穴老吾曩者恒欲策名王庭徼上一命以榮吾親今余髮且種種矣徒以下澤款段優游田里謂吾親何遂起而謁選授光祿寺之大官署正署在紫微帝座之旁典

上法膳及諸祭饗宴犒之事近臣中號爲

繁劇公日舉其職而後卽安四夷貢者朝廷

命寺宴之向來多以生物供公據成例令烹飪

而薦受宴者人乃大驩寺門外賈販襍選列于

前公曰此何地若輩居之以爲市乎悉驅之錢

穀出納有主者堂嘗以綜理屬公公念其易生

染指疑固辭不受命以故寺長貳若行吾趙公

震岡丘公玄仗徐公皆競以才品賞拔之會滿

三年考書最上天子是以有勅命之褒人

方謂公以才受知徘徊郎署旦夕且有峻秩而

公有子太學之喪遂與馮安人決計奉母歸卽



諸公以大義留公弗能得矣公既失太學念孫九行幼孤日夕劔于旁躬自誨迪俾繩祖武而慰其父于地下九行既以成立公素彊健人謂公之醇德必享大年以待孫之顯也天不憖遺安人先逝不三年而公繼之嗚呼痛哉始贈公以貲雄里中爲人樸實亡它腸目曰長者公席父貲不改其素奉贈公及三母色養備至居喪哀戚有加禮飲人以和然不妄通賓客生平惟與刺史伯倫許公光祿長卿許公侍御仲雅許公明府生子沈公太學春谷胡公藩幕平林歐公爲莫逆友諸公或吐納風流寄興華曠公默然而目親之人人重其爲篤行鞠躬君子也向公稱貸者多不責子錢貧不能償往往舉券焚之王某負官錢當鐫職公畀數十金全其官張某子因事係官或謂公舊逋時可索也公曰乘人之危以徼利吾弗忍置而不問薛某死妻舉



所貸公母錢以進公謝弗納令待其子長議償  
前貸公之爲德于鄉者若此安人幼婉嫵有志  
行贈公聞其賢爲公迎之旣歸佐公事舅姑供  
祭祀甘毳亡失時染盛亡闕事者人稱其孝問  
遺姻族撫御臧獲動中禮而有法或時值公欲  
濟人之急方擘畫思以副之安人業從旁脫簪  
珥佐公費矣舉太學愛而能勞幾及見其貴而  
賈安人心抱至痛念公上有母下有孫輒強起  
佐梱政間從公御版輿娛侍王安人而含節以  
育孫孳孳靡倦也已又爲公置媵爲廣嗣計躬  
自僻處一室長齋禮佛間損湯沐費範像飯僧  
以資冥福夫以安人之內行淳備真與公所謂  
黽勉同心德音莫違者計其身所享受亡一不  
與公埒天之立厥配也豈偶然哉盖余耳目里  
中大家盛衰之故嘗爲之累欷而太息也嘉隆  
前擁高貲者多奉法好禮畏官府服舍毋敢芬



華數十年來少具鼎鐘之奉乃競爲豪侈以明  
得意甚至衣絲躡縞乘堅刺肥蒼頭廬兒習以  
爲常恬不知怪然未幾而傾覆相踵不啻疾風  
之卷秋籜行潦之奔大壑也鄉之豪侈實所以  
速其敗耳公道師陶倚貲侔卓鄭乃任俠不爲  
孟公豪舉不爲元龍獨近法贈公之樸實者進  
以是服官退以是訓其子孫使世世守而勿墜  
此馬伏波所以思少游王義方所以戒闕黨也  
今之世求如公者可多得耶余謂公可爲守官  
者法公與夫人逝而里之耆舊又失一典刑矣  
余是以讀九行所爲狀而悲之九行雖痛父之  
早亡幸得躬承大父大母之訓自矢以展兩世  
未竟之志其才行足倚也陳之祚唐 量乎公  
與安人可以瞑矣公之卒以天啓丙 之八月  
十二日距其生嘉靖乙未之四月二十五日享  
年六十有八安人之卒以天啓癸亥之七月十



八日距其生嘉靖庚申之十二月初四日享年六十有四子一卽中正以廩生入太學娶胡氏太學春谷公女皆蚤卒女二一適太學生何樊如侍御仲雅公子一幼未字孫九行庠生娶焦氏宮諭澹園公女孫太學茂慈公女孫女二一適庠生王鯉學博崑石公子一適張如璿孝廉懷我公子曾孫女一墓在神策門外某山之原公素精青烏家言躬卜以葬馮安人而虛左以待已今啓安人之壙合而窆焉公治命也余久從公父子游蓋昔人所謂交在紀羣之間者知公爲深故不辭文學之請志公而系以銘

銘曰畱都清議覈于汝南月旦之評公獨保其實勝之名金陵舊俗漸于東晉風流之習公獨守其文勝之質人皆曰予智夫誰知義可市人徧爲爾德夫誰知志可則不于其子必于其孫宜乘車之高其門有榮其生有哀其死宜相杵



雪堂隨筆 卷三  
之輟于里北山之阡長發其祥公與安人終焉  
允臧史氏銘之死而不亡於乎陳之世惟永昌  
明河南衛輝府通判 誥封直奉大夫河南  
開封府同知文莊表公暨元配 誥贈宜人

凌氏合葬墓志銘

原夫駢珪纍組之彥內外必有以相成瑤林瓊  
樹之姿先後每難于競爽若乃夫負妻戴祖創  
孫承一德一心有作有述象服配山河而作

龍章襲雲漢以爲昭若我奉直公與贈宜人者  
可謂人倫之盛事天德之上儀逃矣高騫難乎  
並駕者矣公以天啓丙寅之某月某日捐館舍  
宜人先公二十幾年以萬曆某年之某月某日  
卒子觀察大夫懋貞奉公啓宜人之壙合焉禮  
也手同年方伯朱公狀渡江詣余屬其爲志大  
夫余同年友也余名聯驥尾幸接撫塵之游誼  
切令原蚤結升堂之拜典刑忽墜涕已漣如盛



美當傳言唯謹爾敬掃墓門之石大書羨道之  
銘敢副名山聊傳幽谷按狀公姓袁氏諱世科  
字惺夫別號文宇一稱更生揚之泰州人也系  
出汝南衆獎奉高之致名流江左獨標彥道之  
名雖譜諜久而莫徵然淵源實知所自自吳中  
而徙泰則自士達公始也世閱百年人踰萬指  
隱居自守素德不升中葉有起家經術舉進士  
仕未甚顯其以仕易農累世滋大實肇自公父  
海墩公公諱巍鵬搏學海鳳覽儒林志旣烈于  
風霜文正魯夫龍虎以春秋舉嘉靖丙午應天  
之鄉試杜當陽釋水之解已自名家董廣川繁  
露之篇未登大對欣青箱之有托知玄草之必  
傳配華孺人而公生焉公天賦英奇人儀開美  
鸞鷲集肩之羽詎止一毛渥洼汗血之駒實爲  
千里年當舞象志學屠龍入則過庭出而游塾  
學窮四部知閉戶之已堅書富三冬念窺園而



未暇然松析竹盡謝交游映雪焚膏何知寒暑  
鑽研日厲纂組日工蓋已目無全牛匪直書能  
半豹者矣時同邑中丞海樓凌公與海墩公友  
善見公英峙知其不凡遂申昏姻之約以女女  
焉卽宜人也亡何試而爲博士弟子辭鋒亡敵  
經笥不窮宿學遜其登壇先聲振于辟舍及乎  
都比遂列賢書時萬曆之四年丙子也距海墩  
公鄉舉之年正三十載其所薦名皆九十六異  
哉拜前拜後儼周魯之步趨慚長慚卿異紀羣  
之高下南宮射策擬秉羽而先登北闕上書需  
臨軒之後命公抱璞數返下帷轉深如是累年  
數奇未售阿房之賦不減二京戰場之文竟迷  
五色公時有不遇之感宜人每從旁慰解之公  
愛玩賢妻益堅厥志嘗卧病旅邸幾累月餘宜  
人起居之訊踵接于途輾轉之勞身悴于室公  
心感其意憤發有加奈何龍門之腮累暴狗監



之薦轉疏匡衡解頤且隨牒而試吏毛義動色  
姑捧檄以慰親慨然太息曰吾今可以仕矣先  
是海墩公偕計道卒東昌公徒跣扶櫬而歸宜  
人襄之克舉大事時公猶未第也後華孺人病  
瘦公與宜人操藥進之其色焦然竟不能起時  
公已六上公車矣公旣除服乃歎人壽之幾何  
謂河清之難俟謁選授閩之仙遊令仙遊巖邑  
也地接四溟天迴三島脂膏莫潤烽燧累聞公  
戒小鮮之烹厲羔羊之節敦畊勸穡星霜屢稅  
于桑田問俗觀風阡陌幾巡夫芟舍四野聽扶  
犁之春雨一簾來拂座之清風吏畏民安途謁  
巷罟邑東諸嶼番舶之所出沒也有司列戍而  
守用邊蠻方公躬度其地可垣者垣可柵者柵  
疑城旣設魏軍驚八月之濤攻城已窮墨子裕  
三年之守斯亦功垂永賴戒凜無虞者矣念彼  
青衿每勤勸課顧茲白屋尤切撫綏振鷺充庭



共有投鱸之兆蜚鴻蔽野永無碩鼠之號至若  
給官契以杜囂訟之端更家丁以釐冒充之弊  
嚴漏港以核拋洋之稅修保甲以防伏莽之姦  
莫不允自上裁著爲絜令中牟雉乳宜來三異  
之褒葉縣鳧飛當作百城之冠夫何宜人之變  
愴于厥心家難忽閭宦情遂薄紫萼可薦亟歸  
張翰之舟黃菊方華蚤返陶潛之逕道府惜賢  
而走檄吏民遮道以攀轅藐爾孤征浩然長往  
久之乃有衛輝別駕之命故事邑令予告者

不復注選公此擢蓋異數也虔刀可贈移文已  
勒于山庭麗紱旣投據榻愈安于海曲時開門  
而延客惟堪二仲之來常插架以貯書坐享五  
車之富別起東山之墅不空北海之尊性癖手  
談身耽坐隱夜分不倦日晷累移公可謂跡寄  
寰中神遊方外者矣及繼室以石差有孟光之  
同隱非亡羸女之俱仙掌上雙珠光生赤水庭



中三鳳聲振紫庭家慶方隆國恩是篤爰諭大  
夫蚤登仕版大夫辭不獲命黽勉從之及貳大  
梁位高守相顧庭闈而彳亍紆組綬以裴徊公  
勗以遠圖勉之大義大夫治高八郡名重兩河  
最上 國家下璽書褒勸之晉公秩如子官宜  
人與石太宜人封贈如例已大夫晉守南康又  
晉副滇臬皆意不欲行強而後發然而千盤鳥  
道驚迴蜀客之船九折羊腸忍叱王尊之馭亟  
拋劍佩歸卧丘樊椒盤不厭于更陳萊綵肯辭  
于屢舞兼以瑤環瑜珥次第稱觴絲竹管絃續  
紛獻壽人謂公之壽祺如川之方至也神明之  
用不衰觴奕之情轉勝漢朝計相兒齒方生洛  
社耆英賓筵初秩豈謂公一旦奄然而長逝哉  
公孝繇天植仁本性成明發謹二人之懷終身  
作萬間之庇官儀復覩坐亡串狹之容家釀欲  
傾醉罕頽唐之貌旣宏覲覽尤廣編摩口不絕



吟筆無停綴所著遂初堂稿諸編共若干卷王  
充之論聞者詫爲異書杜預之篇見者視爲武  
庫是以當公旣物別駕念陽許君引太丘文範  
之例謚公文莊勤學好問志強勝敵易名之典  
實中其聲狀所謂雖私議而實公評者也宜人  
蘭芳菊秀玉潤金貞女訓旣閑姆儀斯樹桓少  
君來自貴室不難行汲而挽鹿車柳夫人旣誕  
名卿且佐讀書而丸熊膽同搽水鏡清識不遜  
于山公獨處絳紗高誼允同于謝媪琴瑟靜好  
蘋藻馨香栝棗之澤常新機杼之音不輟繇是  
舅姑歡其婉順僕御戴其慈和賓客飫洗腆之  
供族黨感問遺之惠雜佩屢解垂珥時捐風旣  
穆于閨中教遂流于閩外矣公旣策名天府子  
亦接武雲達宜人且以儉助廉以勤敦敬魯敬  
姜之修婦職必亡愧而後卽安劉真長之聽母  
評必有當而後可受閨門肅若朝典家法埒于



國風其佐公而令仙遊也官方既審六條內德  
尤孚三事懸魚不解巢雀可窺出邸擁綠輿以  
蔽身斷獄執丹筆而實涕鵲符既應翟茀方來  
芝檢將開萱庭正永令妻賢母將膺兩國之封  
夕醴晨餐當作萬年之頌乃既念其夫又念其  
子間關險阻凌犯風濤往來不憚驅馳霧露遂  
蒙跋涉空釜有徵于占夢生香不驗于返魂淑  
命不融冥期遂迫時年方幾十有幾嗚呼痛哉  
斯時也公悼傷之巾車空返秦嘉援明鏡以興  
悲遺掛猶存潘岳撫流塵而揮泪飛龍垂翮棲  
鳥亡依迨夫華山之墓既開狄道之木已拱誓  
雖同穴歡未畢輪抑何修短之不齊合離之有  
數也然而婦以夫榮母緣子貴列茲鼎俎揭黃  
壤以如生宜爾子孫儼素顏之猶在可謂生無  
遺憾物有餘榮今則延津龍化而故劍可求遼  
海雀歸而亡書可讀公與宜人且申契濶于九



原甘沈冥于萬世又寧復介介于修短之年合  
離之限哉大夫蓼莪之痛方抱恨于終天烏鳥  
之情更銜悲于往日爰依故壟式啓新阡綸音  
炳煥長依日月之光宰樹鬼峩永固丘陵之氣  
矧盛德已書于銀管徽音無斁于錦機東京之  
甲第占肯構之可尋北闕之榮光屬縣延而未  
艾所以瞑公與宜人其何所不足焉而意猶皇  
皇充充如有所未及也白雲在天嘆瞻依之靡  
近紅日南迈嗟岷岷以二從支牀何異于王戎  
劉薦勿忘于陶侃朱方伯所述狀皆大夫泣血  
而語之者余讀之有餘恫焉玄宮載啓翠琰方  
題杼茲不斐之辭慰彼無窮之慕二宮詹慕先  
知曙杼里之藏十世乘輪餘慶衍比干之策旣  
爲之志因系以銘

銘曰筮仕而令壤接于莆乘鯉以飛壺公之壺  
屏星却駕一駒空谷我師古人豐玉荒穀封秩



五品服此牙緋爲橋爲梓奕葉相輝著書滿家  
追琢萬古地擲金聲山藏玉府一觴一咏樂此  
餘年乘化而返委蛻如仙有美宜人令德來括  
昔愴孤鶯今懷跨鶴東城之原白楊蕭蕭蛻蛭  
雙龍光燭于霄何以銘之詒我瓊玖其石不磨  
其人不朽

題中峯和尚趙文敏書刻金剛經跋後

中峰大師具大辯才開示正法眼藏所著廣錄  
正弁州所謂王簡栖頭陀寺碑以北統之筆鋒  
發南宗之心印者學者宗之然第知其語妙天  
下未有知其書法之工者其書法亦復不傳讀  
跋趙文敏所書金剛經出師手筆虬龍片甲鳳  
凰一毛真希有之物也觀其結體清森運機奇  
拔旣嵯峩而有骨復散朗以多姿蓋大有得于  
臨池三昧者文敏一瓣心香皈依幻住微獨佛  
法豈其戈法亦有兩相印可者邪是經出現之



異司馬偶然居士業已臚而列之余獨于大師  
書法歎未曾有一爲拈出蓋重其人所以重其  
字重其字所以重其法也或有謂余不好字義  
好字蹟將有如曇陽子之所訶者請問佛法字  
法爲一爲二若以爲一則退筆成家如智永懷  
素之流于最上一乘何以了無干涉若以爲二  
則三點成伊如摩醯首羅天面上三目世尊所  
說字體真諦顯然余鈍根不能從大師指端拈  
出示人司馬書師法文敏佛法師中峰其爲我  
下一轉語

王芝房過訪卧病未能款奉雨中寄懷

寒雨瀟瀟獨掩扉過從無那賞心違高情未少  
新知樂多病頻驚舊侶稀朝市媿予稱大隱雲  
霄快爾得雄飛瑤林自在風塵外想像凌空鶴  
氅衣

王芳槐五十詩以祝之



玉樹瑤林媚草堂聽歌金縷薦霞觴種松霜坼  
龍鱗古看竹雲梢鳳尾長辟世何須碁共隱迹  
名祇合醉爲鄉門中屢葉稱人瑞漫擬安期有  
秘方

顧八兄除夜有詩見懷予是日亦有寄懷之  
作可謂同心之言如元白梁州故事也

老去情親見面稀興來惜與故人違白鳧黃鵠  
紛紛是覆雨翻雲事事非半壁棲雲心更嬾千  
峰踏雪思猶飛椒槃此夕誠堪誦誰共中林咏  
采薇

再次韵

坐引新桐向夕張夜聽高論轉琅琅風花歌滿  
吳姬肆春草詩成謝客堂黃剖蠟房供海錯紫  
芼蓴葉薦溪芳庭中婪尾紛前席忍對佳辰不  
舉觴



銷夏小品

江寧遯士顧起元

遠菴先生密提心印顯唱宗風時藉咏歌別  
傳教外顧念遯叟夙號知音不惜明珠暗投  
接引遯叟雕蟲結習老病不休未受鉗鎚謬  
爲唱和兩經旬日得二十篇時屬歆蒸賴茲  
逃暑品曰銷夏錄示同人不厭葛藤關我蓬  
艾



遠菴先生過訪即席賦呈

相隣咫尺別經年每憶離羣倍惘然  
車轍火停蓬戶側履聲仍到草堂前  
池痕碧漲花間雨山翠青橫柳外天  
乘興藥闌還可看不妨樗散共留連

遠菴先生以談禪新詩見示率爾賦答

非禪非律兩無功常在追風躡影中  
三乘有三非上乘六通無六是圓通  
撥開翳眼尋真月掃盡浮雲現太空  
更設一重公案在不如休偃臥

墻東

再次前韻呈遠菴先生三首

搬柴運水是神功薦取龐公一語中  
黃葉止啼無實法拈花微笑有真通  
破除夢幻還因幻銷隕虛空又說空  
莫訝豐干更饒舌寒山題徧赤城東

誰建降魔第一功看君秉鉞在師中  
當場頓使



千軍服納款旋令萬國通常有光明如日月更  
無依傍似虛空太平早向無心定銅柱何須鎮  
海東

隨緣度日有何功無限風光本地中纔到石頭  
知路滑幾叅臨濟得玄通過谿忽見桃花咲擲  
瓦俄聽竹響空欲駕金輪乘白象莫教鈴鐸太  
丁東

遠菴先生次子奉贈韻四首見答不揣荒

陋如數呈和

應徐唱和憶當年慧業文人詎偶然成佛豈應  
居謝後名家端不愧盧前書藏玉府標三管法  
演珠函動五天嵇阮竹林玄賞在轉因疏嬾倍  
留連

流水心期不問年白頭青眼共依然題名我媿  
三王後觀樂君論六代前南寺鐘鳴春聽雨西  
牕燭翦夜談天驪珠先得誰能和敢向羊何語



金夏八品  
三  
惠連

大隱三朝度禮年紫芝眉宇更超然函三直語  
筌筮外得一常居渾沌前閒坐弄舟移白日高  
吟搔首問青天一牀好共維摩室海上誰云逐  
曾連

再次功字韻二首呈遠菴先生

鐵丸嚼破好施功纔涉廉纖便不中正好懸崖  
將手撒豈容官路許私通竿頭進步行方穩鑊

裏安身見始空識得五行顛倒法原來離坎是

西東

茫茫蕩蕩說無功墮在聲聞酒甕中未聽無弦  
琴一曲早聞塗毒鼓三通枯藤嚼盡方知險故  
紙鑽穿始見空一自瀉山看牯後國王水草任  
西東

遠菴先生再次前韻二首見示和荅後一  
首追憶亡友陳孟芳何靜之兩君子鍾情



苦語不忍再讀也

種木中林復幾年故人消息兩茫然狂搔短髮  
孤雲外瘦引枯藤落日前忽把尼珠看海月乍  
飛花雨坐江天一期已破三生夢來往何須問  
蹇連

玉樹彫殘痛此年河山千古倍凄然汝南月旦  
三君上鄴下風姿七子前夢斷浮生悲往日心  
疑神理問高天何人更有山陽賦總是忘情也

涕連

遠菴先生再以二詩見示湯賦四首奉荅  
先生句中有眼不佞筆底無花徒以葛藤  
恣其唐突姑視爲引玉之磚布地之髮可  
也

寂寥雙樹幾千年纔說靈山會儼然忽悟蓮華  
生火內蚤叅栢子在庭前惟云舍筏超三界不  
羨乘輪統四天吸盡西江聽說法可容些子得



粘連

見說毘耶杜口年悟來得句喜陶然  
斬猫鋒展屠龍後射鹿機藏伏虎前  
共信毛端中建刹自堪鼻孔上撩天  
大鵬簸海乘風去寒水徒看鴈影連

松陵皮陸是何年白下陰何故杳然自  
合鍛成侏柳下誰云思發在花前  
聲調鳳管將吹月綵挂虹梁欲鏡天  
自聽高山絃久輟因君頻爲鼓

成連

雕蟲自詭白頭年賈勇先登更卓然  
三峽波濤生筆底九霄奎壁映尊前  
風搖薜荔雲迷戶露下芙蓉月滿天  
誰是詞壇射鵬手看君舍矢注叅連

再次功字韻二首呈遠菴先生

孤峰獨宿少同功撥盡寒灰火在中  
金塔九層無縫入鐵山四塞有關通  
衆緣起滅機方寂大



用從橫體自空臨濟繇來稱巨眼肯教行脚驚  
西東  
不明已事枉施功已事明從已事中信手拈提  
皆妙法逢場遊戲總神通依然隱几人非昔因  
地傳聲谷本空莫認朝東真水性性空真水不  
朝東

再次年字韻二首小品成編名曰銷夏賦

此見志

河朔筵開避暑年把君詩過日冷然風清自謂  
羲皇上山靜人如太古前野馬祇應騰酸水夏  
蟲何用語冰天方牀竹枕誰驚夢石鼎松濤斷  
復連

杜客狂吟赤脚年層冰未踏已翛然金僊掌擢  
觚稜上玉女盆傾泰華前揮塵從君銷牖日彈  
碁隨我戲壺天碧筒鼓飲誇河朔獨咏池塘憶  
惠連



金夏八品





